

## Kapítulo 2

# HISTORIA DI MORMONISMO

E fundadó di mormonismo, José Smith a nase 23 di desèmber 1805 na e stat di Sharon, estado di Vermont, Merka, e di tres yu hòmer di Joseph i Lucy Smith. Ora Smith tabatin 11 aña, e famia a muda pa Palmyra, New York.

Smith a konta ku na aña 1820, tempu e tabatin 14 aña, tabatin un interes nobo pa ku religion den su komunidad. Algun miembro di su famia a djòin un iglesia presbiteriano, pero Smith mes tabata índesiso, debí ku el a mira hopi desunion entre iglesianan. E tabata ke sa kua tin rason, pero e no tabata sa kon e por a haña sa esei. Un dia el a lesa den Beibel: "Ma si kualkier di boso ta falta sabiduria, lagu'é pidiDios, Kende ta duna na tur hende generosamente i sin reproche; i esaki lo e wòrdu duná na djé" (Santiago 1:5). Smith a pidi Dios pa duné sabiduria pa e por sa kua religion ta esun bèrdadero. Un mainta el a bai hasi orashon na rudia den mondi. Diripiente el a mira un pilar di lus mas kla ku lus di solo riba su kabes. Smith a skirbi tokante e eksperensia:

"Ora e lus a baha riba mi, mi a mira dos Persona, ku tabatin splendor i gloria ku ta impusibel pa deskribí, parando riba mi, na laira. Un di nan a papia ku mi, a yama mi nòmber, i a bisa, mustrando dede riba e otro—'Esaki ta mi Yu Stima, skuch'E!'

Mi motibu di bai hasi petishon di Señor tabata pa sa kua di tur religion tabatin rason, pa mi por sa na kua mi mester afiliá. P'esei, asina pronto ku mi por a dominá mi i por a papia, mi a puntra e Personanan ku tabata para riba mi den lus, kua di tur religion tin rason —i kua mi mester djòin.

El a kontesta ku mi no mester djòin ningun, pasobra nan tur ta robes; i e Persona ku a papia ku mi a bisa ku tur nan kredunan ta un abominashon den Su bista, ku e religiosonan ei tabata korumpí; ku 'nan ta bin serka mi ku nan lepnan, pero nan kurasonnan ta leu di mi; nan ta siña doktrinanan i mandamentunan di hende, teniendo un forma di santidat, ma nengando su poder.'

Atrobe El a tahá mi di uni mi mes ku nan; i hopi otro kos El a bisámi, ku mi no por skirbi awor aki."<sup>2</sup>

Segun Smith, hende religioso a persiguié pa motibu di e vishon aki. Promé ku Smith a bai drumi anochi di dia 21 di sèptèmber 1823, e tabata konfesá su pikánan den su kamber. Diripiente el a mira un lus ku a bira mas briante ku lus di solo di mèrdia. Un persona a aparesé parando na laira, ku un kashaka blanku blanku bistí. Smith a konta ku:

"El a yamámi na nòmber, i a bisámi ku e tabata un mensaheromandá for di e presensia di Dios na mi, i ku su nòmber tabata Moroni; ku Dios tin un trabou pa mi hasi; i ku mi nòmber lo wòrdu tené pa bon i malu entre tur nashon, tribu, i lenga...

El a bisa ku tabatin un buki depositá, skirbí riba plachinan di oro, dunando un relato di e promé habitantenan di e kontinente aki, i e orígen di nan. Tambe el a bisa ku e ta kontené e plenitut di evangelio, manera e Salvador a komunik'é na e habitantenan antiguo.

Tambe, ku tabatin dos piedra den bognan di plata—i e piedranan aki, pegá na un korasa, ta konstituí loke ta yamá e Urim i Tumim—depositá huntu ku e plachinan; i e poseshon i uso di e piedranan aki tabata forma e Videntenan den tempunan antiguo òf promé; i ku Dios a prepará nan ku e propósito di tradusí e buki...

Atrobe el a bisa mi, ku ora mi haña e plachinan ei di kua el a papia—pasobra tempu pa haña nan no a yega ainda—mi no mester muestra nan na ningun hende; ni tampoko e korasa ku e Urim i Tumim; únikamente na esnan na kende mi lo wòrdu mandá pa muestra nan; si mi hasié lo mi ta destruí. Mientras e tabata papia ku mi tokante e plachinan, e vishon a habri mi mente di modo ku mi por a mira e lugá kaminda e plachinan tabata depositá, i esei asina kla i distinto ku mi a rekonosé e lugá ora mi a bishit'é.<sup>3</sup>

Smith a mira Moroni bolbe na shelu despues di esaki. Anto e mésun anochi el a aparesé dos bes mas i komuniká e mésun informashon i tambe a agregá mas instrukshon i spièrtamentu. Ya kaba tabata mainta i Smith a bai trabou. Pero debí ku el a sinti hopi débil el a disidí di bai kas, pero na kamina pa kas el a pèrde tino. Atrobe Moroni a aparesé i a bolbe ripití loke el a bis'é e anochi anterior.

Inmediatamente despues di e vishonnan, Smith a bai na e lugá unda e plachinan tabata, rekonosiendo e sitio mes ora (e serito konosí awendia komo "Cumorah"). Ora Smith a kita un piedra grandi el a deskubrí e plachinan, e Urim i Tumim, i e pecheru, nèt manera Moroni a bisa. Ma ora Smith a purba saka nan for di nan lugá, e mensahero a tah'é bisando ku e no ta permití pa tuma nan te presis kwater aña despues. Sinembargo e mester bolbe na e mésun sitio kada aña riba e mésun fecha, 22 di sèptèmber. Smith a obedesé, i kada biaha el a topa e mésun mensahero ku a dun'é mas instrukshon.

Durante e tempu di espera, Smith a traha pa Josiah Stool. El a keda na kas di Isaac Hale, na Harmony, Pennsylvania, i a kasa ku su yu, Emma, dia 18 di yanüari 1827, apesar ku señor Hale a prohibí e matrimonio. Smith a insistí ku e prohibishon tabata pa motibu di e persekushon okashoná pa su vishon. Pero e rason mas probabel ta pasobra Smith tabata mira destino, usando piedranan pa haña tesoro.<sup>4</sup>

Ora e kwater añanan di espera a pasa, dia 22 di sèptèmber 1827, Smith a bolbe na e mésun sitio i e biaha aki e mensahero a duna Smith e tesoro tan antisipá, bisando e ku e mester warda nan bon i debolbé nan ora e mensahero ta pidi pa nan. Segun Smith, ora hende a haña sa ku e tin e plachinan, nan a purba kita nan for di dje i a persiguí e.

P'esei Smith i Emma a bolbe muda pa kas di Emma su mayornan na Harmony, i aya a kuminsá tradusí e skirbimentu riba e plachinan di oro usando e Urim i Tumim. Oliver Cowdery a bishitá Smith dia 5 di aprel 1829 i for di e tempu ei a funshoná komo Smith su sekretario.

Debí ku e plachinan a menshoná boutismo, Smith i Cowdery a bai hasi orashon den mondi tokante esaki. Juan Boutista a aparesé, a pone man riba nan i a ordená nan, bisando:

"Riba boso, mi rumannan sirbidó, den nòmber di Mesias, mi ta duna boso e saserdosia di Aaron, ku tin e yabinan di angelnan sirbidó, i di e Evangelio di

arepintimentu, i di boutismo pa medio di inmershon pa pordon di pikánan; i esaki nunca lo wòrdu kitá for di mundu, te ku e yunan di Levi ta ofresé un ofrenda na Señor den rèkstitut."<sup>5</sup>

Tambe Juan a manda Smith batisá Cowdery, anto pa Cowdery batisá Smith. Despues nan a pone man riba otro i a ordená otro na e saserdosia aaróniko. Spiritu Santu a baha riba nan i nan a profetisá i a komprendé Skritura kla kla.

Juan a splika ku e ta aktua bou outoridat di Pedro, Santiago i Juan, i ku nan tin e yabinan di e saserdosia di Mèlkisedèk, kua saserdosia Smith i Cowdery lo haña na un tempu stipulá. Segun Juan Boutista, Smith lo ta e promé ansiano di iglesia i Cowdery e di dos. Despues di e evento aki (15 di mei, 1829) nan a risibí e saserdosia di Mèlkisedèk na man di Pedro, Santiago i Juan na kantu di riu Susquehanna.

*Te awor e relato aki ta mas parti e storia ofisial di iglesia mormon tokante orígen di e Iglesia di Hesukristo di e Santunan di e Deláster Dianan.* Esaki ta importante pa nota pasobra mas despues nos lo nota ku tin problemanan serio ku e relato aki.

Smith a kompletá tradukshon di e plachinan, i a entitul'é e "Buki di Mormon." Martin Harris a logra haña \$3000 pa imprimí e buki dor di hipotek su kunuku. Dia 26 di mart 1830, nan a kuminsá bende e *Buki di Mormon* pa di promé biaha na un libreria na stat di Palmyra. Martin a hiba tambe un kopia di algun di e lèternan di e plachinan huntu ku Smith su tradukshon pa profesor Charles Anthon na New York. Segun mormonnan, e profesor a identifiká e lèternan komo idiomanan egipcio, kaldeo, asiriako, i arabir i ku Smith su tradukshon tabata di alta kalidat.

Segun instrukshon ku el a haña, Smith a pone e plachinan di oro bèk na nan lugá den e seru despues di kompletá e tradukshon. Brigham Young, di dos presidente di iglesia mormon, a skirbi detayá loke a sosodé e momentu ei:

"Oliver Cowdery a bai huntu ku profeta Smith ora el a depositá e plachinan aki... Oliver ta bisa ku...e seru a habri, i nan a dreña den un kueba, unda tabatin un sala grandi i espasioso... Nan a pone e plachinan riba un mesa; e mesa, ku tabata pará meimei di e sala, tabata un mesa grandi. Bou di e mesa tabatin un monton di plachinan kasi dos pia haltu, i probablemente tabatin den e sala aki mas plachi ku hopi garoshi por karga..."<sup>6</sup>

E plachinan tradusí a wòrdu hibá bèk na shelu despues.

Dia 6 di aprel 1830, Smith i Cowdery i kuater persona mas a funda e "Iglesia di Kristo" ku awendia ta konosí komo e "Iglesia di Hesukristo di e Santunan di e Deláster Dianan." Smith a ordená Cowdery komo ansiano, anto Cowdery a ordená Smith. Dentro di un luna, e iglesia tabatin kuarenta miembro.

Poko tempu despues ku e iglesia a keda fundá, Smith a haña ku mester kuminsá un obra mishonero entre e indjannan debí ku e *Buki di Mormon* ta konserní nan. Supuestamente ku e propósito aki Smith i hopi di su siguidornan a muda pa Kirtland, Ohio na novèmber, 1830, i a konstruí e promé tèmpep mormon. "Profeta" Smith a haña hopi revelashon durante e tempu aki, a kompilá esakinan i a publiká nan den e promé edishon di *Doktrina i Aliansanan*, un otro buki ku mormonnan ta konsiderá sagrado. Tambe Smith a kuminsá revisá Beibel e tempu ei. Dentro di seis aña nan a krese te 16.000.

Pa motibu di oposishon, e mormonnan a muda pa Jackson County, Missouri. Na novèmber, 1833, ora un líder mormon, Sidney Rigdon, a reta e estado pa bringa kontra e "santunan," nan a smer Sidney i Smith ku asfalt, tapa nan ku pluma, anto a kore ku nan. E mormonnan a muda pa Far West, Missouri, i a sigui pa estado di Illinois pa motibu di mas oposishon. Smith a yama e sitio "Nauvoo" keriendo (inkorekto) ku e palabra ta nifika "lugá

bunita" na idioma hebréo. Aki mormonismo a prosperá. Nauvoo a bira e stat mas grandi di Illinois, i aki nan a kuminsá konstruí e di dos tèmpep mormon.

Hosé Smith i algun líder mormon a praktiká poligamia na sekreto miéntras públikamente nan a rechasá e práktika. Otro líder mormon a rechasá poligamia, pero no por a konvensé Smith. E tabatin hopi poder. Ya kaba nan a koron'é komo "rei" di e reino mormon, i e tabata buska e presidensia di henter Merka na año 1844. Desgustá ku loke Smith tabata hasi, su oponentenan a inisiá un koránt yamá *Nauvoo Expositor* pa trese na klaridat loke tabata sosodé di bèrdat. E promé edishon a skeponé Smith su poligamia. Smith, a realisá ku e korant lo destruí su reino. Siendo alkada di Nauvoo, el a yama un reunion di e konsilio, i a afirmá ku ni e ni su ruman, Hyrum, ta kulpabel di poligamia òf adulterio. E konsilio mormon a vota na su favor. Smith a duna òrdu pa destruí e imprenta<sup>7</sup> i tur kopia di e korant. E mésun dia, 10 di yüni 1844, sentenares di hòmbenan armá a bai kantor di e koránt. Nan a hiba e imprimidó, e korantnan (nan a logra imprimí un edishon so) i otro material den kaya, kibra nan na wèrki, anto kima e kantor ku tur su pertenensianan. Ora doñonan di e empresa a reklamá na gobernadó di estado di Illinois, Thomas Ford, el a duna òrdu pa arestá Smith. Smith a manda su soldánan pa prevení pa nan arest'é, i e mes ku su ruman Hyrum a skonde na otro banda di riu Mississippi. Tòg nan a arestá nan i a sera nan na Carthage, un stat den serkania di Nauvoo.

Hopi hende a pensa ku Smith lo logra skapa kastigu pa su krímennan. P'esei 27 di yüni 1844 pa 5'or di atardi, mas òf ménos 140 hòmber armá i disfrasá a ataká e prison di Carthage i a asesiná tantu Hosé komo Hyrum. En realidat esaki tabata un sla duru kontra e oponentenan di mormonismo, pasobra den bista di e Iglesia di e Santunan di e Deláster Diananan, Hosé Smith a muri komo un héroe i mártir di 38 año, demonstrando na mes tempu ku e tabata un profeta di bèrdat.

Selekshon di susesor di Hosé Smith a lamta hopi desakuerto. Un grupo, apoyá pa Emma Smith, Hosé su biuda, a insistí ku Hosé Smith a apuntá su yu, Hosé Smith III, komo su susesor. Otronan a presentá Sidney Rigdon, Smith su promé konsehero, komo un kandidato. Ma Brigham Young a argumentá ku e diesdos apòstelnan ta e outoridat final di iglesia miéntras no tabatin un presidente, i komo ku Brigham tabata presidente di e apòstelnan, nan a nombr'é.

Esnan ku no a aseptá Brigham Young komo e líder nobo a pèrdè nan miembresia. Esnan ku a bai tras di Hosé Smith III a forma nan mes iglesia konosí awendia komo "Iglesia Reorganisá di Hesukristo di e Santunan di e Deláster Dianan." Te awendia nan presidente ta un desendiente di Hosé Smith, i nan sede ta lokalísá na Independence, Missouri. E mormonnan ku ta na Antia, ku ta e grupo mormon mas grandi, ta esnan ku a aseptá Brigham Young komo nan profeta.

Estado di Illinois a notifiká e mormonnan ku nan mester bandoná Nauvoo. Na luna di febrüari, 1846, bou di direkshon di Brigham Young, nan a kuminsá un biahe difísil, enfrentando frieldat, tempestat, indjan salbahe, pleitu entre nan mes, falta di kuminda i paña. Algun asta a bandoná nan fe durante e biahe. Un testigu mormon a deskribí e biahe komo "400 garoshi bayendo den direkshon di—ken sa na unda." E biahe a bira insoportabel. Dia 24 di yüli 1847 nan a yega na un sitio ku bista riba un vaye espasioso na Utah. Ora Brigham Young a mir'é el a bisa e palabranan ku mormonnan tin bon grabá den nan memoria: "Esaki ta e sitio!" Ei nan a traha e stat kapital di mormonismo, Salt Lake City.

Poko tempu despues di nan yegada, na yüni 1848, un plaga di tirakochi a menasá di destruí nan kosecha, kreando e pusibilidat ku hopi hende por muri di hamber. Ma ora paranan a kome e tirakochinan, e mormonnan a tuma esaki komo un señal di Dios Su bendishon pa ku iglesia mormon.

Entre 1856 i 1860 mas ku tres mil hende ku a konbertí na mormonismo a pusha nan garoshinan un distansia di dos mil kilometer for di Iowa City pa Salt Lake City. Tambe e Santunan a paga pasashi pa miles di hende di Oropa ku a bira mormon pa bin na Utah. Brigham

Young a trese mas ku 100.000 hende na Utah. Ora señor Young a muri, tabatin 140.000 mormon.

Young tabata un bon líder, sinembargu e no tabata un hòmbler "santu" manera mormonnan ta pint'é. Na aña 1857 algun hende ku no tabata mormon tabata ke biba den bisendario di e mormonnan. Brigham a laga un di su obispunan, John D. Lee, mata nan tur— mas ku 100 hende. Nan a arestá Lee 20 aña despues, i promé ku su ehekushon, el a konfesá ku el a kometé e krímen bou òrdu di Brigham Young i a skirbi tokante su eksperensianan komo un mormon.<sup>8</sup>

Hosé Smith i Brigham Young sin duda ta e dos personanan ku ta sobresalí den mormonismo, asta te awe. Nan tabata e promé dos presidente di iglesia mormon. Aki ta sigui un lista di tur e presidentenan di e Iglesia di e Santunan di e Deláster Dianan huntu ku e fechanan di nan presidencia. Den kada kaso e presidencia a dura te morto:

1.     Hosé (Joseph) Smith: 6 aprel, 1830 - 27 yùni, 1844  
Fecha di nasementu: 23 desèmber, 1805  
Edat na morto: 38  
E 12 apòstelnan a dirigí asuntonan di iglesia for di 8 ougùstùs, 1844 - 27  
Desèmber, 1847.
2.     Brigham Young: 27 desèmber, 1847 - 29 ougùstùs, 1877  
Fecha di nasementu: 1 yùni, 1801  
Edat na morto: 76  
E 12 apòstelnan a dirigí asuntonan di iglesia pa un periodo di tempu.
3.     John Taylor: 10 òktober, 1880 - 25 yùli, 1887  
Fecha di nasementu: 1 novèmber, 1808  
Edat na morto: 78  
E 12 apòstelnan a dirigí asuntonan di iglesia pa 21 luna.
4.     Wilford Woodruff: 7 aprel, 1889 - 2 sèptèmbe,r 1898  
Fecha di nasementu: 1 mart, 1807  
Edat na morto: 91
5.     Lorenzo Snow: 13 sèptèmber, 1898 - 10 òktober, 1901  
Fecha di nasementu: 3 aprel, 1814  
Edat na morto: 88
6.     Joseph F. Smith: 17 òktober, 1901 - 19, novèmber, 1918  
Fecha di nasementu: 13 novèmber, 1838  
Edat na morto: 80
7.     Herbert J. Grant: 23 novèmber, 1918 - 14 mei, 1945  
Fecha di nasementu: 22 novèmber, 1856  
Edat na morto: 89
8.     George Albert Smith: 21 mei, 1945 - 4 aprel 1951  
Fecha di nasementu: 4 aprel, 1870  
Edat na morto: 81
9.     David O. McKay: 9 aprel, 1951 - 18 yanüari, 1970  
Fecha di nasementu: 8 sèptèmber, 1870  
Edat na morto: 96
10.    Joseph Fielding Smith: 23 yanüari, 1970 - 2 yùli, 1972  
Fecha di nasementu: 19 yùli, 1876  
Edat na morto: 95
11.    Harold B. Lee: 7 yùli, 1972 - 26 desèmber, 1973  
Fecha di nasementu: 28 mart, 1899  
Edat na morto: 95

12. Spencer W. Kimball: 26 december, 1973 – 5 novèmbër, 1985  
Fecha di nasementu: 28 mart, 1895  
Edat na morto: 90
13. Ezra Taft Benson: 10 novèmbër, 1985 - 30 mei, 1994  
Fecha di nasementu: 4 ougùstùs, 1899  
Edat na morto: 94
14. Howard W. Hunter: yùni, 5 yùni, 1994 – 3 mart, 1995  
Fecha di nasementu: 4 november, 1907  
Edat na morto: 87
15. Gordon B. Hinckley: 12 mart, 1995 -  
Fecha di nasementu: 23 yùni, 1910

---

2  
3  
4  
5  
6  
7  
8